

Calvin Maduro a sera temporada cu otro actuacion stabiel y efectivo na agrado di su manager

BALTIMORE- Calvin Maduro a iniciá temporada di Liga Grandi como e gran incertidumbre pa loke ta su futuro como pitcher profesional.

Sinembargo el a convertí su mes den e sorpresa agradabel di e staff di pitcheo di Baltimore Orioles e temporada aki, y Diahuebs anochi a sera su actuacion e temporada aki, cu otro bon actuacion.

El a tira seis entrada y un tercio permitiendo tres careda limpi cu cuater hit y tirando ocho ponche contra Boston Red Sox, den un lucha formal cu Hideo Nomo.


Finalmente Orioles a perde e encuentro y e pitcher perdedor a bira John Wasdin e relevista kende a drenta na lugar di Calvin den di shete entrada.

E promer seis entradanan Calvin di Aruba a dominá Boston totalmente permitiendo solamente tres imparabel y tirando ocho ponche, pero su control tabata e unico problema.

Un biaha mas Manager Mike Hargrove tabatin elogio pa e hoben lanzador Arubiano, mustrando cu Calvin a lanza bon y unicamente tabatin problema cu su control den inicio di e partido.

"Mi ta kere cu el a superá Hideo Nomo den clase awenochi", Hargrove a mustra despues di e partido.

E lanzador di Aruba no a



fungi den e decision final pero cu e actuacion solido aki, el a clausurá tambe kizas su mihor temporada den Liga Grandi.

Calvin a terminá e temporada cu record di 5 wega gana y 6 wega perdí caminda cu el a tira un total di 93.2 inning, c'un porcentahe di careda limpi permití di 4.23, un di e mihor man den e staff di Orioles.

Su actuacion solido den e dos parti di temporada, ta duna Calvin Maduro un ventaha pa e proximo temporada caminda e lo ta un di e posibel cuater habridornan estelar di e staff di Orioles.

El a gana esaki pa e tipo di actuacionnan manera cu e tabatin contra Boston Red Sox, y otro ekiponan fuerte manera New York Yankees, Toronto Blue Jays y Cleveland Indians.

Si Calvin logra traha duro den off season riba su condicion y otro aspectonan tecnico den su sistema di tira, ta casi sigur cu e lo ta den e rotacion di e proximo temporada di Orioles di Baltimore y tur cos ta mustra cu el a siña su les di pasado, ora cu e no tabatin e boluntad pa traha duro den su tempo liber.

Informacion cu nos a ricibi t'asina cu Calvin Maduro a yega na un acuerdo cu e equipo di Baseball Venezolano, Leones de Caracas p'asina ta riba e rotacion di e equipo pa cu e proximo campeonato di Baseball Profesional na Venezuela.